

ЛҮИМА СЭРИПОС

16 января
2020 года
№2
(1212)

Общественно-
политическая газета
Ханты-Мансийского
автономного
округа-Югры

www.khanty-yasang.ru

E-mail: gazeta@khanty-yasang.ru

Основана 11 февраля 1989 года

МАНЬЩИ НЯВРАМЫТ ЯНЫТЛЫЯНУВ



Саранпавылныл тетымхури

Ты
номерт
ЛОВИНЬТЭН:

Өлнэ мавт
тэнут-пормас
вараве

3

Хул савсыр
тэнутыг
варияныл

6

Эквалке 85 талэ
ты төвлы

8

Салыңколт
яныгмам
саран пыг

9

Пунси
павыл ханты
нэ

14

Маньщи, ханты ос ёрн няврамыт магыс ман касың тал касыл
варыглэв. Та тал ман касылув тох намайлыслүв –
«Ам колтаглум урыл маньщи латныл потыртэгум». Няврамыт
15 потыр ос 46 мань тина-охсат ты касылн тетсыт.

Касыңе ман мүйлупсал щёпитаслүв.

Ты хурит Саранпавыл няврамыт янытлыманыл порат пöслым öлэгыт
- Никитин Максим, Тихонова Елена, Лелятов Сергей ос Тихонова
Анжела, тан ётаныл Мерова Светлана Савельевна
(маньщи латың ханищтан нэ) люли.

ЛЯХХАЛЫТ

ЯНЫГ КҮЩАЮВ ЛАТЫҢ КЕТЫС



Ишхипың маңыг ылым хури



Мирколт рупитан күщайт

Ты этпос 15 хөталэт Россия Президентув Владимир Путин Федеральный Собраният рупитан махумн латың кетыс. Ты кастыл сав яныг күщайт Москва үст акван-атыглавёсыт. Мән округ күщажов Наталья Комарова тув ос ялыс.

Общероссийский народный фронтит рупитан хөтпат Россия янытыл сапрани вәрыгласыт ос Владимир Путин кина суснә тотап хосыт хунтлуңке махум вөвыгласаныл. Мән округувт тамле сапрани Ханты-Мансийск, Сургут, Нижневартовск ос Нефтеюганск үсыт вәрыглавёсыт. Округ миркол күщайт, саккон хаснә депутатит ос мөт хөтпат Ханты-Мансийск үст «БукВА» нампа нәпак ловиньтан колт акван-атхатыгласыт.

Президентув потыртаңке хунь астыс, ты колт атхатыглам махум китыглавёсыт, манхурип номт тән кетум латың

урыл оныщегыт. Сав хөтпат лавсыт, Владимир Путин Россия янытыл оlnә мир урыл номс. Тав махум пусмалтан вәрмал, ханищтан ос щемьятын нётнә урыл потыртас. Няврамыт янмалтан щанит-ащит савнун олныл ойтунке патавет, «Материнский капитал» лавнә олныт ос тах нөх-нётавет. Нуса тотнә щемьят оln-нётми-лыл ты талныл йильпи щирыл ойтунке овылтавет.

Россия Конституция, шар мак яныг саккон урыл, махум ос потырта-сыт. Ты нәпакн йильпи латың хансунке ань эри. Ос тамле латныт пирмайтаңке эри ман

әти, Россия янытыл оlnә мир тах китыглавет. Ты талт мән пуссын нәпак тартуңке тах вөвавёв. Пенсия ләшал нөх-нётнә ос сав мөт эрнә вәрмалит урыл шар мак яныг сакконын тах хансавет.

Мән округувт ханищтап ос маңылат хөтпат вәрмалыныл щирыл рупитан департаментит күщай хум Алексей Дренин ты сапранин ос эхталас. Ты урыл тав лавыс:

– Владимир Путин няврамыт ханищтан вәрмал урыл сав потыртас. Тав лавыс, ань савнун садикыт ос школат унтунке эри. Ты рупата мән акваг вәрилүв, округу янытыл касың тал йильпи ханищтахтын колыт рупитаңке овылтахтэгыт.

Ань элал 1-4 классын ялантан няврамыт пуссын тәнки оln ойттал школат вос тыттавет. Мән округувт ты талныл йильпи сакконит рупитаңке овылтахтасыт. Ань агмың-мосың няврамыт школат нас тох тыттавет. Округувт төва үсыт ос павлыт няврамыт школат тәнә мәгсыл миркол палныл олныл тастыглавет. Мөт мат аквпалә щанит-ащит тәнки ойтэгыт, аквпалә ос мирколныл нётавет.

Ам номсэгум, ань

Россият пирмайтым сакконит мөт щирыл тах хансавет. Ты рупата просвещение Министрства колт рупитан хөтпат вәрэгыт. Мән йильпи щирыл хансым нәпакыл хунь кетавёв, тонт мән ты няврамыт оln ойтнә тал тыттуңке патыанүв.

Лёккар хум, округ дума депутат Николай Ташланов тув ос вөвыглавес. Тав лавыс: «Владимир Путин ань мир пусмалтан вәрмал урыл сав емас латың лавыс. 75% савит маңылат агит, пыгыт оln ойтнә тал лёккарыг ханищтаңке патавет. Ординатуран ялантан маңылат хөтпат тот ханищтахтын магсыл оln ос воссыг ат ойтэгыт тах. Ань Россия янытыл сав пүльницатыт лёккар хөтпат ат төвылхатэгыт, няврамыт тох ханищтахтуңке ке патэгыт, ам номсэгум, савнун лёккарыг пүльницан рупитаңке тах эхтэгыт. Тав ос ФАПыт, пүльницат унттын ос савсыр ишхипың утыт ёвтнә урыл потыртас. Мән округувт ты рупата акваг вәраве ос округ бюджетныл ты вәрмал нупыл акваг сав оln тастыглаве. Ты эрнә рупата мән элал тах вәрилүв».

Людмила ТЕТКИНА



Н. Ташланов потыртты

ЛЯХХАЛЫТ

Тыт тэнут-пормас ос варава



Ты этпост Ханты-Мансийск үс мирколт пресс-конференция олыс. Кина суснэ тоҕап хосыт Екатеринбург, Сургут, Нижневартовск ос Нефтеюганск үсыгыт оҕнэ ляххал тотнэ хөтпат округ кўщай ваңын хум Алексей Забозлаев, промышленность департамент кўщай хум Кирилл Зайцев ос Югра фондыт кўщайи рўпитан хум Роман Генкель эт потрамасыт.

Кўщайт лавманьыл щирьыл, округувт мөлты тал сыс экономикав мощ савмыс. Ман мавт мавой маньыл нөх-винэ хосыт савыңпалэ олн сэлаве. Ос ань ты накт мавой сав нөх ат виве, 2018 тал пора темыг хультыс.

Ма-вой овтнэ кертурьит кивраньыл арген паңктувэсыт, тананьыл сыстамтаңкве эрыс, ты паттат мавой нөңхаль хартнэ вэрмалы ювле хультыс. Нефтяникыт касың тал ищхыпың утыт эвтэгыт ос йильпи кертурьит вэрэгыт. Китсат савиткем млрд. солкөви тув холтэгыт. Ты хосыт тан эмщакв тара-паттэгыт, рупатаньыл хумус элаль мины ос мансавит мавой нөх-выгыт.

Тэнут-пормас вэрнэ щирьыл савсыр рупата ос варава. Тыт нефтегазовое машиностроение, нефтегазохимия предприятият олэгыт, нор яктаве, хул,

нэвыль ос мот тэнут варава, яласан лэңхыт састумыг варавет ос мот рупата олы. Мөлты тал пасныл савсыр порсыт лакква-атуңкве патвэсыт. Ты порсыт ань китынтыг пормасыг вэрнэ магыс эл кетавет. Порс атнэ магыс яныг хусапыт щэпитавет.

Ювле хультым талт махум олнаньыл савсыр тэлан ватихал тастыгласаныл. Ты хосыт округувт пуссын аквьёт онтоловсат арыгтем млрд. солкөви савит олн сэлвес. Тыт тармыл тэнут-пормас вэрнэ щирьыл ос нила арыгтем триллион савит солкөви округув олн сэлүңкве вэрмыс.

Ма-вой маньыл нөх-винэ хосыт «Сургутский завод стабилизации конденсата им. В.С. Черномырдина» шар сав олн тасты. Норныл партыт сылнэ мат ос «Югорский лесопромышленный холдинг»

нампя предприятие сав олн сэлы. Ты предприятия субсидия-олныл ат майлаве, такви рупитанкве вэрми.

Мөлты тал «Кода Лес» нампя предприятия кол унттым рупитанкве патыс. Акв тал пальткем рупитанэтэ сыс, тот махум хус тас кол вэрсыт. Ты коланыл Юграт, Тюменский область ос Башкирия мат оҕнэ хөтпатн тыналасаныл.

Ты тал округувт тэнут вэрнэ тэла нила савит процентын нөх-савмыс. «Сургут үс нэвыль вэрнэ завод» сав олн тотыс. Ты завод хус тал пальт округувт рупиты. Щицкурекуйт яналтан «Обь-Регион» нампя компания ос сав олн сэлыс.

Мөлты тал щицкурек коланыл колнакыл нэтовес, ань тыналан нэвыль иң савнувег эмтыс. Сартын тан хурумсат тонна нэвыль тастыгласыт, ань атсат тонна вэрэгыт.

Та талт округувт яныг пэрма пүсвес. Тот яныгсат налыман савит мис ань оныщаве. Та пэрмат рупитан махум миспоснунт эвтсыт. Ты ищхыпың ут мисэква щакванэ палт маставе ос такви щаквит посы. Ань ты вэрмалы щирьыл округувт савнув щаквит посуңкве патвес.

Югра мат кэрыл вэрим шаңквыт ань ос нила процентын савмысыт. Химиял савсыр пормасыт савнув вэрүңкве патвэсыт. Ты вэрмалы щирьыл «Сургутский завод химических реагентов», «Когалымский завод химических реагентов» нампя предприятияг ос нефтяникыт машина-ныл ос ищхыпың утаньыл хот-щэпитан кол эмщакв рупитэгыт. Тувыл Пыть-Ях үст кертурьит вэрнэ предприятия ос янытлавес. Тан вэрнэ кертурьитаньыл мавой маньыл нөх-винэ «Роснефть» нампя компания акваг эвтэяныл.

Миркол кўщайт лавсыт, округувт рупитан предприятияг акваг олныл нэтавет. 2019 тал сыс пуссын аквьёт тан онтоловсат арыгтем млн. солкөви савит олныл майлувэсыт. Савыңпалэ олн федеральный бюджетныл кэтыглавес, аквапал охсатэ ос округ бюджетныл тастыглавес. Ты коньпал тыт савсыр проектыт элалы тотнэ магыс махум аква млрд. нэлсат нупыл ат млн. савит солкөви олн холтсыт.

Николай МЕРОВ

КҮЩАИТ РҮПАТАНЫЛ

Акван-юрщхатым ёмашакв вос рӯпитэгыт

Молты тал оигпам ляпат Ханты-Мансийск үст олнэ сосса махум «Югра лылыёп» рӯпитан колн вобиньтальвёсыт. Тонт ты үс колт пуңкотнэ нэ Ирина Самсонова хурум тал сыс вәрум рӯпатаныл урыл потыртас. Овлэт савсыр тэлат щёпиталсыт, ётылнув такви сав рӯпата оцнэтэ магыс ос мот махум ат алыманэныл паттат мörсың порат акван-атхатыглахтуңке патсыт.

Ирина ань мот рӯпата вәруңке таңхи ос махмытн лавыс, тавен нётнэ хотпатныл хотьютаныл күщаиг вос паттаве. Тувыл Ханты-Мансийск үс «Югра лылыёп» кол күщаиг Раиса Гаврильчик пёриявес, ос тавен Надежда Живец нётуңке паты.

Ты этпост сосса махмыт ос акван-атыглавёсыт. Ань Раиса ос Надежда 2020-2022 талыт сыс манхурип тэлат вәруңке номсэгыт, ты урыл потыртасыг. Уст олнэ ханты ос маньщи хотпат сыресыр ялпың хоталыт порат акван-хонтхатыглаңке ос мүйлуңке лавхатсыт. Хотты ёмталан тэлат пуссын этпосыт щирыл лакква-хасвёсыт, мощёртын «Тылащ

пори» хотал мүйлэгыт, тувыл «Уринэква хотал», Победа яныг ялпың хотал, ма янытыл сосса махум янытлан вәрмалы ос округув намхоталэ янытлан тэлат касың талт янытлаңке патьянүв ос та кастыл матыр кас манос касыл вос щёпитаве.

Хонтан мят няврамаквет магыс касыл олыс

Тувыл мот мят рӯпитан «Югра лылыёп» колныл ман пищмал кётвёсүв. Кондинский район Болчары павылныл Анастасия Подрезова хансыс, тән ты этпос хурмит щислат Йильпи тал янытламаныл порат мань няврамыт магыс касыл вәрыгласыт. Ты элы-палт Анастасия



Ханты - Мансийск үст



Белоярский үст

савсыр матт рӯпитан хотпат нэпак ловиньтан колнакн атыгласанэ ос тән акван-нётхатым няврамыт магыс ханты ос маньщи эргыт, ййквыт, ёнгыт щёпиталсыт.

Сосса агиришит-пыгришит такем ёмшакв мүйлысыт, тән тот маньщи ос ханты латныт хунтамласыт, ханты махум ййкв ханищтасыт, амщит амщисыт. Анастасия тавен нётум павлың махманэн пүмашипа латың кёты ос тән пуссын «Газпром-Хантос» нампа колн яныг пүмашипа лавёгыт. Ты колт рӯпитан хотпат няврамыт магыс мүйлупсат ёвтсыт.

Сосса щёмьят акван-атхатыглаңке патэгыт

Белоярский үсныл Ирина Фирсова ляххал кётыс, тав та үст «Югра лылыёп» колт күщаиг



Белоярский үст олнэ махум

КҮЩАИТ РҮПАТАНЫЛ

олы. Тән тәнки ұсанылт савсыр щёмьят акванатнэ магсыл клуб вәрмыт ос таве «Хатлые» намтсаныл.

Тот щәнит-ащит акван-хонтхатыглаңкве патэгыт ос нывраманыл ёт матыр кас вәрэгыт. Хотты яныг хотпаныл пёс йис накыт урыл вос потыртэгыт, хуньт матыр щаквщуңкве манос сак хартуңкве вос ханищтавет.

Тән сав вәрнэ номт кос оньщэгыт, ты накт клуб рупататэ овылтыма порат Ахмалетдиновыт, Неттиньт, Аминовыт, Лельховыт, Корепановыт, Нёмысовыт, Ирган, Юхлымовыт, Волдиньт ос Руссу щёмьят акванатыглавёсыт. Тувыл Верхнеказымский, Касум павлыгныл ос Белоярский ұст олнэ мащтырлан хотпат мүйлуңкве вовиньталвёсыт.

Тот Валентина Багишева, Касум павылныл олнэ нэ, «Ая шиви» эрыг эргыс. Эргёт тох эргаве, хоты элы мән манос мот хон мән минэгын ке, наң нэмхуньт самын патум мākен, щāнягын-ащагын, рутанын ул ёрувлэн.

Тувыл мәнщи мōйттыт мōйтыглам Эква-Пыгрищ махум палт ёхтыс, тав Ащирма ойка холът масхатас ос махум янытлас. Тән хорамтым хōвт пōхат аквёет ййквсыт, эргысыт, ощхуль вәрсыт.

Ты ялпың хотал минам сыс махум пуссын тәнки халанылт ёмщакв вāйхатасыт, щāнь-ащит ос тәнки ныврамыныл ёт тот мүйлысыт.

**Тамара
МЕРОВА**

Югра урыл нэпакыт хансавет



Мән мāv олмыгтым пāsныл ань Монтоловсāt тālэ тōвлыс. Ты кастыл мōлты тāl ойгпам порат Москва, Екатеринбург ос Сургут ұсытныл учёный махум Ханты-Мансийск ұсн ёхталасыт. Тыт «Академическая история Югры» нампа конференция вāрыглавес.

Ань учёный хотпат Югра мāt пёс пораныл олум вāрмалит нэпакытн хансыяныл, атхатыглам махум ты урыл потыртасыт. Округ общественный ос внешний связь департамент кўщай хум Константин Репин лāвыс: «Ты нэпакыт хосыт тыт олнэ мирыт тәнки мәнаныл, йис олупсаныл ос олнэ хўлнэ наканыл урыл ёмщакв вāңкве патыяныл. Мōлты тālныл Югра мā школатыт ловит классыт ханищтахтын агит-пыгыт магыс йильпи нэпакыт хасвёсыт. Ань ты нэпакыт хосыт ныврамыт элаль ханищтахтэгыт».

Россия Академия наука кўщайг рупитан хум Юрий Петров ос тыг ёхталас. Тав ты нэпакыт хаснэ тēла щирьыл кўщайг олы. Югра мāv урыл пуссын

аквёет нёлолов нэпак акв юи-пāлт хансавет. Тāнаныл хаснэ магыс хўрум яныг институтыт рупитан учёный хотпат вуйхатасыт. Ты Россия наука Академия, Сургут ұс университет ос Екатеринбург ұс археология наука институт.

Матахмат тāl ювле хультум порат Россия Академия наука рупитан хотпат Россия олупса урыл йильпи нэпакыт хансуңкве овылтахтасыт. Ты вāрмаль магыс савсыр мāt рупитан пёс йис олупса урыл ванэ хотпат нётуңкве вōвсаныл.

Ань пуссын аквёет хўрумсāt элумхōлас ты потрыт хансэгыт. Тāнанылн хус нэпак тāстуңкве эри. Мōлты тāl това махум хансум потраныл тув мисаныл. Ань ты потрыт ёмщакв ловиньтавет ос 2021

тāлт нэпакыг вāруңкве овылтавет.

Общественный ос внешний связь департаментыт кўщай вāңын нэ Инна Арканова лāвыс: «Округувт китыт тāl «Многовековая Югра» нампа проект щирьыл пёс потрыт акван-атавет. Тән «Академическая история Югры» нампа нэпакыт палт хансавет тах.

Щар овыл щёс Югра мā урыл онтоловсāt тāl ювле хультум порат потрыт хансыглымат. Та пāsныл ань тыг мус ты пёс потрыт пуссын нёлолов нэпакытн хансавет. Округувт олнэ мирн ты вāрмаль сака мўстыс. Ювле хультум тāl сыс акв млн. савиткем элумхōлас ты вāрмаль щирьыл нётмил вāрсыт».

Ань учёный махум ты потрыт эрнэ щирьыл акван-щёпитыяныл ос хўрум тāl сыс нёлолов нэпакыг уртым хансыяныл ос таратыяныл тах.

**Николай
МЕРОВ**

ХҮЛ АЛЫШЦЛАН ВАРМАЛЬ

Хүл савсыр тэнүтыг вәрияныл

Октябрьский район Приобье павылт «Лангки» сосса махум община рупиты. Тән хүл алышлэгыт ос вораёгыт. Күщаиг тот Андрей Иванович Маремьянин олы. Пувум хүланыл тән тыналаңкве төванакт Ханты-Мансийск үсн ёхталэгыт. Тыт өлме порат хум такви вәрнэ рупататэ урыл анузн потыртас.

Ань мохсаң, үсхул, Акәрай хүл элаль савмалтан магыс алышлэҕкве ат тартаве. Махум савыңпалэ сорх пувёгыт. Акв тал сыс кит тонна савит хүл пувнэ магыс квота-нэпакыл мивет. Ты коныпал тән сорт, сыг, кәсэв, шапак ос мот хүл алышлэгыт.

Пувум хүланыл Приобье павылыл тотыяныл, тот тәнүт вәрнэ кол оньщёгыт. Та колт хүланыл солвалтыяныл, посымыл восытаптыяныл, пәнка кивыри пиныяныл ос төваныл пөльтыяныл. Тән Югорск, Советский, Нягань үсытт өлнэ ләпкат ёт договор-нэпак хассыт. Щёпитама хуланыл тыналаңкве тув тотыяныл. Махум ты атың хүлкве аква ёвтэгыт. Ты коныпал хүл мәнэ няврамыт колытн ос школатн тәстэгыт.

Андрей Иванович - ханты хум, тав рүтанэ Халапанты павылт өлсыт. Тыимагыс тав та

мәт хүл алышцлан община ты вәрыс. Ты мәнэ павыл Перегрёбный ос Шеркалы павлыг халт олы, тот ты алышлым яласэгыт. Туи порат, хунья витэ төсуңкве паты, тән мәнэ ятныл кональ миннэ сорх пувёгыт. Ос савыңпалэ хүланыл Ас ят алышлэгыт. Ань ты накт общинат нёлолов хөтпа рупиты.

Тән ань вораёҕкве овылтахтасыт. Вор ма тәнки нупыланьл хасылтасыт, вөркөлыт үнттысыт. Тот нёхыс пувёгыт ос апишкве катын-патталэгыт. Юи-өвыл талытыт вөрәнүвт сав вөртөлнүт ёмтыгтаңкве патыс. Ос тав ляльтэ яласан вораён хум мошща хультыс. Савыңпалэ вораён хөтпат тавён новхатуңкве пилэгыт.

Маколыңойка сахитэ тынтлуңкве Омск үсн кетыглыяныл. Тот мащтыр хөтпат эрнэ щирыл камнямтыяныл. Пёс руц махум маколыңойка са-



А.И. Маремьянин

хитэ хот-сакум нянь коласыл тытылтым тынтлалсаныл ос норыт онтсыл тагаталсаныл. Тыщир сака ёмас, сахи ат лэгыс, ат пасыс ос мапорсуитн ат хұратәлвес. Ань тох нэмхотыют ат вәри.

Община онтолов-хуйплов тал рупиты. Хүл тәнүтыг вәрнэ магыс государство палыл субсидия-олныл мош нётавет. Община күщай хум лавме щирыл, ань рупитаңкве тәрвитыңнүвөг патыс. Касың порат матыр магыс оln ойтүңкве эри. Тара ат ке ойтхатэгыт, сав оln арнтаг атхатуңкве вөрми. Ты хосыт тәнки рупата вәрнэ төва хөтпат рупатаныл ёл-пөйлттыяныл ос лаппантхатэгыт. Ань грантоln нётмил олы. Хум нэпаканэ тув миңкве арталахтыгләлы тах, эрың, матсавит олныл нётаве.

Андрей Иванович өпатэ хүл алышцлан ос

вөраён хумыг олыс. Такви йис мәтэт вөраим яласас ос хүл алышцлас. Пыг мәнэлатыг өлмёт өпатэ урыл потрыт кинсым архив-колн ялыс. Тот нэпакыт тамле потыр хөнтыс, насати, Советский власть ёхтум порат, тав кулакыг лаввес. Оlnэ колэ, пувлын-колэ, толганэ, хұлпанэ, хапанэ ос мот пормасанэ пуссын хот-вуйвёсыт.

Тувыл пыг мош олыс ос өпатэ вәрүм рупататэ элаль тотуңкве номылматас. Ты вәрмаль щирыл тав хүл алышлэҕкве ос вөраёнкве та овылтахтас. Ләшал-ләшал толгыт, хүлпыт ос мот савсыр пормасыт ёвтыс.

Хум ань хұрум няврам оныци. Яныг пыгён ты вәрмаль ос сака мұсты. Ётыл ты вәрнэ рупататэ тав элаль тотуңкве тах патытэ.

**Николай
МЕРОВ**



Саранпавыл ныврамыт янытлавёсыт



Ювле хульгум талт яныгполь этпосныл мән таквс этпос мус «Ханты ясанг» ос «Лүймә сәрипос» газетат рүпитан хөтпат ныврамыт мағыс касыл вәрыгласыт. Мәнщи ләтңыл ты касыл тох намайлыслүв – «Колтаглум урыл мәнщи ләтңыл потыртәгум» («Расскажу о своей семье на родном языке»).

Ты этпост Саранпавыл нывра-

мыт ханищтахтуңкв овылтахтамыл порат акван-атыглавёсыт. Ос мән вәрыглам касылувн потыр ман мән тина-охса тәтум 18 агитпыгыт тот янытлавёсыт. Школа кұщай Андрей Дмитриевич Попов мән тәтум янытлан нәпаканув ос мүйлупсанув тананылн мисанә.

Ты ныврамыт халт Сергей Лелятов ос Елена Тихонова нөхпатсыг.

Касылн Светлана Савельевна Мерова ос Ольга Владимировна Лелятова ханищтан нывраманән тән потрыт ос тина-охсат тәтсыт. Тәнатән мән пүмашипа ләтың ләвөв. Матъёмас мәнщи махманув халт тамле кәркам хөтпат олэгыт. Тән хосытаныл щань ләтнүв элал суйты ос ныврамытн ханищтаве.

Валентина Хозумова

Мәнщи щәмья мүйлупсал майвес



Елена Фризоргер ос Валерий Сайнахов Хальүс район Саранпавылт олэг. Тал котиль этпос 20 щислат ты мәнщи щәмья китыт ныврамән самын патыс. Пыгрищән Егорыг намтыстән. Елена Ханты-Мансийск үс пүльнищан кәтыглавес. Ты колтагылт ос акв

пыг яныгми, тав наме Макар. Ань тав омагә, аятәт ос мән ащитә Саранпавылн юв үриянә. Елена юв тартым порат Валерий ойкатә ос ляпа рүтанә пүльнищан әхталасыт, хорамың лүптат ос мүйлупсал таве мүйлуптасаныл. Мәнщлат щәмья янытлаңкве округ

мирколт рүпитан хөтпат ос әхталасыт.

Ань округувт йильпи сәккон рүпитаңкве овылтахтас, ты талныл самын патум ныврамыт, рущ ләтңыл ләвнә «Расту в Югре», мүйлупсал мивет ос 20 сөгыра солкөвил ойтает. Мән округувт касың талныл мощщанув ныврам самын паты, тыммагсыл тамле сәккон ань ты пирмайтавес. Мәнщи щәмья тамле мүйлупсал ос майвес.

Елена ты урыл тох лавыс: «Ам ты нәтмил урыл ищхипың утыт ляххал тотнә лөпсыт ловиньтасум ос телевизор хосыт хұлыгласум. Ты олныл пыгмән магсыл маснут ос әрнә пормасыт тах әвтымән».

«Расту в Югре» нампа мүйлупса ань округувт

самын патум ныврамыт пуссын мивет. Ань касың үст ос павыл миркол кұщайт ты тал ущты самын патум ныврамыт ос тән оманыл-әтяныл янытлаңкве әхталасыт ос ты мүйлупсал мисаныл. Ныврамыт мән нәтнә хусапыл мивет, тот олн ошнә карточка ос яныг кұщай нә Наталья Комарова хансум пишматә пиным олы. Ты олныт щәнит-әщит «Госуслуги» нампа ищхипың ут лөпсыт манос телефон хосыт виңкве вөрмөгыт.

Мән, редакцият рүпитан махум, ты мәнщи колтагыл янытлылүв, сав емас, сымың ләтңыл ләвилүв. Ныврамагән пуштагыл вос яныгмәг, Най-Отыранылн вос үргалавет.

Людмила ТЕТКИНА

ЯНЫГПАЛА ХӨТПАТ ЯНЫТЛЫЯНҮВ

Эквакуе 85 талэ ты төвлы

Софья Семёновна Азисова ань Ёст олы. Ты этпос 31 хоталэт тав 85 талэ тах төвлы. Тав этэ хонтхатыгламум порат такви олупсатэ урыл, колтәглэ ос няврамаге урыл тох анумен потыртас:

– Ам Луи Няхлаң павылт 1935 талт самын патсум, тот яныгмасум. Омам Евдокия Ивановна Вынгилева олыс, атам Семён Иванович Вынгилев. Маниг олмум порат атам хотталы шалтыс. Тонт сака пылышману пора олыс, махум маныр оцсыт, пуссын хот-алмавёсыт.

Та пора руш латңыл «раскулачивание» тох лаввес. Атяв лаввес, тав павлувт олум ялпың пормасыт Кульпасн вос тотыянэ. Ащён такос пөйкщувес, тув ул вос новхаты, тох лавыстэ: «Новхатэгын те, акв сопакын ваңнын ұлтта тах мины».

Тан ань та минасыт. Кимкьясуй ос Потрасуй павлыг халэнт ёл-пөйтсыт, элалы атяв минуңкв ат кәсащас. Алхатаңкв патмыт, тонт тав писалил алвес. Хоса ат хонтыглавес, милиция хотпат ёхтысыт. Тав этэ мином хотпат титыглаңкв патвёсыт, тан та хултсаныл, хот таве ёл-щөпитамамыл. Акв сопак тал олыс, ащён хумус лаввес, тохи ёмтыс. Потырталсыт, тав аще саманыг олыс.

Ман омав ёт манттев хурум няврам та хултсүв. Мань эщув хурум талэ төвлыс, тав атимыг ёмтыс. Элнаң май мир сака ат пусмалтавес. Мен каңкум ёт омамённ янмалтавёсмён. Каңкум наме Костя олыс, тав 82 талэ мус олыс.

Школат ам Луи Няхлаң павылт, тувыл Кульпаст хаништахтасум. Тонт

павлувт Вадичуповыт, Гындыбиныт, Таратовыт, Пуксиковыт, Албиныт олсыт. Школа асламум юи-палт Салехард үсн минасум, тот зоотехникумт хаништахтасум. Тит талн тот хулытуп-талвёсум, салың колт рупитасум. Няхщамвөльт ветеринарыг ос моц рупитасум.

Тувыл Ёсн ёхтысум, пүльницат санитаркаг рупитасум. 1964 талт Ханты-Мансийск үст «Роковские курсы» варвёсыт. Тув ойкам ёт та минасум. Тав рупитас, ам ос хаништахтасум. Ойкам хатань хум олыс, наме – Акрам Азисов.

Усың махум потырталэгыт, тав сака ёмас хотпаг олыс. Нэг-хумыг 52 тал аквёет олсыг, тарвитың агм паттат



Софья Семёновна Азисова

Акрам 2016 талт атимыг ёмтыс. Софья Семёновна тубдиспансер пүльницат ват арытем тал рупитас, тувыл пенсиян минас. Эква ань ты хотал мус хул няслуңкв лаглыл яланталы. Касың хотал лаглыл мины, хотал палыт тот ят та олы.

Тав мань тагыл юнхатуңкв сака хасы. Ты

урыл Дина Тимофеевна Лисова тох лавыс: «Тав мань пора пасныл юнхатуңкв патыс, сав маньши суп юнтыс. Пуркат, тентыг юнтуңкв пуссын хасыс. Ань самаге люльсаң кос сунсэг, юнтмиланэ, маньшицт лавнённыл хольт такум-саныг янытат, щар ворил наңкёгыт. Мохлыланэ ос хоттуйтыянэ. Сака каркам, сакпак нэ».

Софья Семёновна ойкатэнтыл тит няврам янмалтасыг. Пыгён ань Ягримт олы, аэропортыг рупиты, акв пыг оныщи. Калерия агитён ойкатэ ёт ос Хальүст олы. Пыге ос агитэ ань ятил ома тэн яныг намхоталэ, 85 талэ, төвлын кастыл янытлытэн, сав ёмас латңыл лавитэн.

Ман, маньши газетат рупитан хотпат, Софья Семёновна ос янытлылүв. Тав сав тал пустагыл элалы вос олы, такви Най-Отыранэн вос ўргалаве, пус кат, пус лагыл!

**Валентина
ХОЗУМОВА**



Пүльницат рупитаме порат

КАСНЭ ВАРМАЛЬ

Сӑлыңколт яныгмам саран пыг

Мӑнылат пыг Юрий Чупров Мань Белоярский ўст ӧлы. Вӑт сӑграпнал ӗтпост тав мӧт мӑнылат хӧтпат ӗт касуңкве Ханты-Мансийск ўсн вӧвыглавес.

Та порат Россия яны-тыл ӗхталам мӑхум ат хӧтал сыс сӑлың сун ўлтта поргысыт, тыньщӑн рӗпыгтасыт, акв мӑныл ӗлӑль поргысыт, ошщӑй-йвӧвыл кӑтыт пувим хӑйтыгтасыт ос сӑграп-суп пӑхвтысыт. Руц лӑт-ңыл ты касыл «Чемпионат России» намаим ӧлыс.

Юрий Хальус район Саранпӑвилныл ӧлы. Саран пыг сӑлыңколт яныгмас, щӑняге-ӑщаге ӗт сӑлы ўрим нӗрт яласас. Сӑлың сун ўлтта поргуңкве, сӑграп пӑхвтуңкве ос мӧт щирыл касуңкве Андрей Дорофеевич Филипповн ханищтавес. Школа ӑстламе юи-пӑлт Салехард ўст ўйхул пусмалтан

хӧтпаг ханищтахтас. Та ўст ӧлым соссса мирыт щирыл касуңкве акваг вӧвыглавес.

Ханищтахтын мӑныл ӑстлас, Белоярский ўсн минас, тот МЧС колн рўпитаңкве вуйвес. Ань касуңкве тав вӑтихал вӧвыглаве. Тав тренер-хӧтпатӗ Александр Павлович Тасьманов ӧлы.

Ханты-Мансийск ўст ӧлум касыл урыл Юрий лӑвыс: «Ўсн сӑв ӗр мӑнылат пыгыт ӗхталасыт. Тӑн халанылт касуңкве тӑрвитың ӧлыс. Ам ань акваг рўпитӗгум, каснӑ колн вӑтихал ялантаңкве ат ӧлымӗгум, тьи-мӑгсыл ӧвыл места ат висум ос юв хультсум».



Мӑнылат пыг сӑлың сун ўлтта поргуңкве ӗмашакв вӗрми, тыньщӑн рӗпыгтаңкве ӧс сака хӑсы. Ты кит касылыгт тав ӧвыл места виңкве кос номсыс, тувыл ӗмашкв поргуңкве ос тыньщӑн мўсхалыг рӗпыгтаңкве ат вӗрмыс.

Ань правила щирыл, 30 метра палыт тыньщӑн ӗт-тотуңкве ӗри. Юрий лӑвыс, сӑлың

мӑхум тыньщӑныл 20 мӗтра палытыт ӧлӗгыт. Тыил хосагнув ке вӑри-яныл, сӑлыяныл тув пӗрхатуңкве ос ӧнытаныл, лӑгланыл-кӑтаныл сак-ватаңкве вӗрмӗгыт. Пыг ӗрнколт яныгмас, ты мўтрап пуссын вӑганӗ. Касылн такви тыньщӑн ӗт-тотыгластӗ. Тыньщӑн сагуңкве ӧтӑтӗн ханищтавес.

Людмила ТЕТКИНА

Марийка ӧги соссса мӑхум хольт касы



Ксения Александрова ӗт ам вӑт сӑграпнал ӗтпост «Чемпионат России» нампӑ касыл ӧлум порат Ханты-Мансийск ўст вӑйхатасум. Тӧнт тав мӧт мӑнылат ӧгит ӗт касуңкве тыг ӗхталас.

Ксения школат ханищтахтаме порат сӑлың сун ўлтта поргуңкве, сӑграп пӑхвтуңкве, акв

мӑныл ӗлӑль поргуңкве ос мӧт щирыл касуңкве патыс. 2010 тӑлт школан тренер-хӧтпа ӗхталас ос

соссса мӑхум касыланыл урыл потыртас, ос такви палтӗ ханищтахтуңкве нӑврамыт вӧвсанӗ. Ты вӑрмаль урыл Ксения таи лӑвыс:

«Ам Нижневартовск ўст самын патсум, тот яныгмасум. Соссса мӑхум нӗмхуньт ат вӑщиньтасанум, тӑн ӧлупсал ат пўмщалахтасум. Амки марийкаг ӧлӗгум ос вӑглум, мӑнщит, хантыт ос марийцыг пуссын финно-угор рўт мирыг ӧлӗгыт. Тренер-хӧтпа ты касылыт урыл хунь потыртас, ам таве сака аты хўнтлыслум. Ос мӧт ӧгит ӗт нас пўмаш мӑгсыл сӑлың сун ўлтта поргуңкве, акв мӑныл ӗлӑль поргуңкве ялсум. Ань лов тӑл сыс касуң-

кве ты ялантӗгум».

Ксения тыньщӑн ӗмашакв рӗпыгты ос сӑграп пӑхвтуңкве вӗрми. Мӧлты тӑл Якутск ўст сӑграп ӗл ӗмашакв пӑхвтыс, ты юи-пӑлт тав «Мастер спорта России» намыл майвес. Ксения лӑвыс, сӑвсыр ўсн ялантаңкве ос тох касуңкве тавӗн сака мўсты.

Мӑнылат ӧги Нижневартовск ўст «Самотлор-нефтегаз» нампӑ мӑ-вӧй нӧх-винӗ компаният рўпиты. Омаге-ӧтяге ӧс та ўст ӧлӗг. Сӑв тӑл ювле хультум порат тӗн Башкирия мӑныл рўпитаңкве тув ӗхтысыг ос тот ӧлуңкве хультсыг.

Людмила ТЕТКИНА

Өлнэ мāv урыл сāv вос вāгув

Ты этпост ханты пыг Виталий Сигильетов Ханты-Мансийск үст өлнэ сасса мāхум ёт хөнтхатыглас. Өвлэт ЮГУ колн ялыс, тот хаництахтын āгит ос пыгыт ёт потрамас.

Виталий Венгрият Будапешт үс университетт «Экономика ос туризм» тēлан хаництахты. Ханты лātңе коныпал венгерский ос английский лātңыл ёмащакв потыртты.

Ань өвлэт тав өвылт-тытэ лāvёгум, хотыл олы. Виталий Нижневартовский район Пугьюг пāvылт самын патыс. Тот ваховский хантыт өлэгыт, омагетяге сасса хөтпаг, сāлы үрег, вораег, хул алыщ-лөг.

Пыг хунь школан минас, руц лātңыл ат потыртас, туп щāнь лātңе вāстэ. Лāви, руц лāтың нулевой классыт хаництаңкв патыс. Школа āстламе юипāлт, 2012 тāлт, ЮГУн хаництахтуңкв минас.

Ханты-Мансийск үст өлнэ сасса мāхум ёт вāйхатас, щāнь лāтың ос культура нōх-вормалан сāvсыр хөнтхатыг-лапынт аква ялантāлыс. Төнт ты потыр хūлыс, ань лāтың щирыл рūt мāхманув палт Венгриян

ялуңкве рōви, мāньлат хөтпат тот венгерский лāтың ос та мāхум культура хаництэгыт. Пыг тув ялуңкве кāсащас.

ЮГУт потыртас

Нāн ань элаль Виталий потре ловиньтэлың:

– Мāхум тот Венгрия мирхал тēлат министерства программатэ хосыт хаництахтэгыт. Тув элы хон мāныл ёхтум мāньлат хөтпат хаництахтынэныл мāгыс олн ат ойтэгыт, өлнэ колнаканыл мāгыс ос ат ойтхатэгыт. Кāсың этпос стипендия олныл мивет. Венгр мāхум туп та урыл номсэгыт, ань мōт хон мир тāн лātңаныл, культураныл вос хаництэгыт, тāнти өлнэ мāнанылт Венгрия урыл вос потыртэгыт.

Венгрыт лāвнэныл щирыл, тāн мāхманыл ань өлнэ мāнанылн пёс йис порат вāнтлысыт. Мōт мирыт халт хоса өлманыл тёпыл, тāнти лātңаныл ат тыпыл-тасаныл, мāньщи ос



Виталий Сигильетов

ханты мирыг ёт рūtыңыщ өлнэ хурияныл ань тыхотал мус оныщияныл. Лātңув щирыл нāңки - мāн акв рūtың мāхум.

Өвыл тāл ам тот венгерский лāтың ос тāн культураныл хаництасум. Тох кāсың хөтпа олы, өвлэт нас лāтың ханицты, тувыл үц элаль хотты университетн ялантаңкв паты. Хөтпа тыхал рūt-

питаңкве вёрми. Сāv мāньлат мāхум венгерский лāтың учителиг рупитэгыт, элы мāныл ёхтум мāхум хаництэгыт. Тамле хөтпа тот сака янытлаве.

Венгрият нилыт тāл ты өлэгум, Будапешт үст өлнэ университетт «Экономика ос туризм» тēла пёриясум. Тот хаництахтын мāхум университетн кāсың хөтал ат ялантэгыт, тāнти



Хаництахтын хөтпат



Сосса мāхум



номсэгыт, хунь эри тув ялуңкве. Студентыт пуссын университет палыл рүпитэгыт, хотьют хот кәсащи, маныр вәруңкве хасы, тув патхаты.

Ты талыт сус ам улпыл хус мат рүпитасум. Ань кит нэ венгерский латңын ханищтыагум, тувыл мирхал аэропортыт рүпитэгум. Колкапай сака яныг, махум тыгле-тувле яласэгыт, товат хот-тыпегыт, ам та хотпатн нётэгум, эрнэ лёңх хүлтэгум.

Маньщи ос ханты агиянуд ос пыгануд тот сака уравет. Латңаныл ваганыл те, тананылн тот ханищтахтуңкве сака тарвитың ати. Ман латңанув (венгерский, маньщи ос ханты) аквхурипат, аквщирыл номсэв, таимагыс маньлат хотпанув тув та уравет. Ам тот нила тал олэгум, щань латың ванэ хотпа ат та ёхта-лас, нэмхотьютув тув ат молямлы.

Тот яныгман няврамыт танти мананыл ёмащакв ваганыл. Школат ханищтахтын касың агирищ, касың пыгрищ манос студент олнэ матэ урыл матыр-ати пуссын ваг - хот хоты мир олы, ят наманыл манхурипат, тьи-таи областит махум латңаныл манос диалектаныл манхурипа.

Ам хунь тув ущ ёхтысум, округув урыл китыглаңкве та патвёсум – Ханты-Мансийск

ўс хунь олмыгтавес, нэпак хаснэ махум ос катыл пöслын хотпат наманыл, хотыл тан олэгыт, та маныр. Хальўс район урыл, маньщи махманув овылтыт сака пүмщалахтэгыт.

Акв мат, акв округт олэв кос, ам тан овылтытаныл нэматыр ат васум, ат хулыгласум, нас сүпнелмтал та үнлэгум. Анумн татем эсырма олыс, сав матыр ат васум. Тувыл номсэгум, школат ханищтахтынэм порат сав нэпак ловиньтаңкве ос матыр-ати пүмщалаңкве эрыс.

Няврамытсакати олнэ мананыл урыл матыр вос вагыт. Ханищтахтын ятил махум, хотьютын кәсащи те Венгриян ялуңкве, таяныт ёмас вәрән, эрнэ нэпаканын щёпитән, тув таквсы минән, рүт мирув латың ханищтән.

Яныгхотпанув ёт үнлахолсув

Аквта хотал хотальят юи-палт ос библиотекан атыгласесув. Тот сосса нэквет рүпитэгыт, пасан вәрыгласыт, махум щәил айтсаныл. Яныгхотпанув, учёныянув ёхталасыт – **Д.В. Герасимова, Е.А. Нёмысова, Т.Д. Слинкина, Е.Д. Айпин,** няврам ханищтан ос ляххал тотнэ махум.

Овыл латың учёный маньщи нэ Дина Васильевна Герасимова вис, тав Свердловский область

Полуночный павылт ханищтахтын маньщи няврамыт овылтыт потыртас. Лави, тан пуссын щань латңаныл ёмащакв ваганыл. Тувыл ёхтум пыг Женя Анямов маньщи эргыт эргыс. Тав Ханты-Мансийск үст олнэ колледжит ханищтахты, эргыт такви вәри. Женя эрганэ ань ищхипың ут хосыт хүнтлуңкве вәрмегын.

Тувыл **Виталий Сигильетов** элаль потыртас. Сосса махманув ёт венгерский латңыл пащалахтас:

– *Йоо напот кииваанок!* Ам ань телефонум хосыт венгерский ос ханты латңыл хансэгум. Овлэт номсысум, тох хансуңкве тарвитың паты. Тувыл мощ ханищтахтасум, эрнэ программа (алгоритм) тув вәрсум. Ань тай ханыщувласум, яныг ман мань потыр пуссын телефонум хосыт хансыянум, хоталь эри, тув кетасаптыянум.

Венгрият олнэ махум ман потранув акванатыяныл, янас колнакыт оныщегыт, пуссын тув пинияныл. Ань үрхатэгыт, эрың латың ванэ хотпа тув ёхты, матыр-ати толмащлаңкве нёты. Хосат тагыл Венгрияныл ман мавн мутраң хотпат ёхталасыт, потрыт, мойтыт, эргыт ёл-хансыласыт – Антал Регули, Янош Гуя, Секей Габор ос мот сав элумхоласаквет.

Ань тыхотал мус ёх-

талэгыт, ман миранув, латңанув пүмщалыяныл. Ам ваховский махум латың щирыл сав потыр кәсаласум, ловиньтасум. Ос маньщи латңыл тай ущпылнэг сав потыр тот акван-атым олы.

Ты туй ман сосса махум магыс ханищтап щёпитаңкве таңхёв. Нила группа атэв – ханты латың: сургутский, ваховский ос казымский диалект ванэ хотпат, ос акв маньщи группа. Ханищтапув ойттур этпост рүпитаңкве паты. Ань эрнэ нэпакыт щёпитэв, ма кинсэв, Сургутский манос Нижневартовский районт вәруңкве номсэв.

Виталий Сигильетов ты ханищтап урыл хоса потыртас, лави, манавн эри щань латңанув ханищтаңкве, культурав, олнэ мав. Элумхолас такви олнэ матэ ат те вагтэ, элаль хумус олы, сома турманколт үнлахолы.

Виталий татем нёмса, сымың хотпа. Округт олнэ сосса мирыт магыс сыме щарги, номтэ савалы. Латңанув хоттал ул вос соймёгыт, мот мирыт халн ул вос тэлыглэв, ты магыс тав сав рүпиты, ханищтахты, учёный хотпатн нёты.

Ты ятил ханты пыгкве пус кат, пус лагыл вос олы, Най-Отыранэн вос үргалаве!

Светлана РОМБАНДЕЕВА

КҮЩАИТ РҮПАТАНЫЛ

Мирн нётмил вәрнэ рүпата

Тал котиль этпост округ мирколт Координационный Советыт рүпитан күщаит сапрани вәрыгласыт. Тән элы-паланылт округ күщай вәңын хум Геннадий Бухтин савсыр проекттыт элалы тотнэ урыл потыртас.

Ты тал ыбылтахтам порат, Россия Президентув Владимир Путин Федеральный сапранин латың кетыс. Ань күщай хум ты урыл потыртас, тав лавыс: «Манавн моляхнув тәрвит вәрмалит мұсхалыг щәпитаңкве эрэгыт. Мир олупсатэ емасыг вәрнэ магыс савсыр проекттыт пирмайтым олэгыт. Ос төва мат тән лобльсаң рүпитэгыт. Ань Президентув тох лавыс, касың күщай хотпа үст, павылт олнэ махманэ

эт вос хонтхатыгылы. Тән этаныл вос потрами, вос хунтлы, матыр тәрвитың тэлат олэгыт, та хосыт вос неты».

Ювле хультум талт мирн нётмил вәрнэ магыс округувт савсыр семинарыт, сапранит вәтихал вәрыглавэсыт. Та порат махум матыр эрнэ тэлат элалы тотнэ магыс ос сав нётсыт. Общественный организацият ты вәрмалы ос акваг уральтым оныцианыл.

Федеральный ос ре-

гиональный проекттыт щирыл матыр йильпи вәрмалы емты, ляххал тотнэ хотпат мирн тара хултыглан латың газетат хансэгыт манос кина суснэ тотап хосыт потыртэгыт. Ты вәрмалы щирыл сав рүпата вәрвэс кос, ос иң сав тәрвитыт мұсхалыг щәпитаңкве эрэгыт.

Югра мат Уральский федеральный инспекторыг рүпитан күщай хум Андрей Руцинский ты сапранит ос олыс. Тав тох лавыс: «Хунь ты проектанув эрнэ щирыл рүпитаңкве патэгыт, тонт мир олупсатэ күпнитыг емты. Савсыр тәрвит тэлат қаркамнувег емщакв щәпитаңкве эрэгыт. Молты тал ман регио-

нытыт олнэ күщаит рүпатаныл уральтасанув. Ты хосыт Югра мат рүпата эрнэ щирыл вәрвэс».

Ман олнэ мавт проекттыт атнэ колт күщаиг рүпитан хум Данила Голубев лавме щирыл, ань округувт нелсат нупыл ат йильпи тэлат щәпитавет, тән ос ман махманув олупсаныл емасыг вәрнэ магыс таставет.

Ювле хультум талт савсыр эрнэ рүпата элалы тотнэ магыс федеральный ос региональный бюджетыгныл ват нупыл нила млрд. арыгтем солкови холтвэс.

**Николай
НИКИТИН**

Яласан ләңхыт өмщакв вос щәпитавет

Ляххал тотнэ хотпат Константин Гребешок, ләңхыт вәрнэ департаментыт рүпитан күщай, эт хонтхатыгласыт. Тән 2019 тал сыс округувт савсыр тэлат хумле вәрвэсыт, маныр тэлаг өмтсыт, пуссын ты ыбылтыт потыртасыт.

2019 талт «Безопасные и качественные дороги» тэла магыс 11 млрд солкови тастыглавэс. Тән савсыр маныл майвэсыт: 6,4 млрд солкови округ бюджетныл, 1 млрд 434 млн солкови Российский Федерация палыл майвэс, тувыл 800 млн ләңхыт вәрнэ үс ос район мирколытныл ос 3 млрд савиткем солкови «Сотрудничество» наппа программа щирыл тастувэс.

Округ янытыл 203 вэрыста палыт ләңхыт өмщакв щәпитаветсыт,

ос тыгыл 160,5 вэрыста нацпроект палыл ойтвэсыт. Ты коньпал 61,36 вэрыста йильпи ләңх вәрвэс. Акв проект щирыл «Коммунистический – Уньюган» павлыг халт йильпи ләңх ос Октябрьский район Комсомольский павыл мус емас ләңх вәрвэс. Тувыл Ханты-Мансийск, Сургут ос Нижневартовск хурум үсыт төва үсхулыяныл ос ты үсыт халт яласан ләңхыт өмщакв щәпитаветсыт. Тән емасыг щәпитыманыл юи-палт тот машинат ос махум сакати

хот ат сакватахтэгыт. Ты ыбылтыт тамле вәрмалит уральтан хотпат тара-паттысыт.

Молты туй Ханты-Мансийск үст Иртыш я ултта вәрим унсах хотщәпитаңкве, йильпи олпыл сартуңкве патвэс. 2004 талт тав хосытэ махум Нягань, Пермь ос Томск үсыт нупыл миныглэгыт. Унсах выгыр ольпанэ төва матэт хотхуслысыт ос нётталыг өмтыс. Тавэ щәпитан магыс Москва палыл олнэ организация рүпатаныл магыс 272 млн солкови вөвсыт ос тувыл округ эт договор-нэпак хассыт. Тән 2019 тал унсах янытэт выгыр ольпыл йильпи сартуңкве ыбылтахтасыт. Тот рүпитан хотпат турап хоталыт нэматыр ат вэрысyt, ту-

выл төва матт кәр аңкваланэ ос хотщәпитаңкве эрсыт. Таиммагыс ты мот рүпатат вәрнэныл магыс унсах янытэт олюптаңкве ат алымавэс. Ты рүпатат ты тув аствавет тах.

2020 талт нацпроект щирыл ләңхыт щәпитан магыс 7,65 млрд солкови тастувэс. Ты тал 71,26 вэрыста палыт ләңхыт йильпи вәравет манос хотщәпитавет. Тыгыл 68,9 вэрыста округныл мот үсытын миннэ ләңхыт олэгыт. Акв ләңх Междуреченский павылныл Тюмень үс мус вәрвэс. Тувыл онтолов унсахыт хотщәпитаңкве ыбылтавет.

**Тамара
МЕРОВА**

СОССА МИР ӨЛҮПСА

Эквaг-ойкаг хумус акван-хонтхатсыг

Ханты-Мансийск үст өлнэ хум Никита Парганов руш латңыл манавн пицма кетыс. Тав рупататэ щирыл сосса махум өлнэ мань павлыгтн сав щес яланталыс ос радиопередачат вэрнэ магыс маньщи хотпатныл савсыр потрыт хансыглас. Тав ань агит хайталан ос пүри вэрнэ потрыт атыс. Ань акв потре ам ты газетан толмаццласлум.

Монин экваг-ойкаг

Ты потыр Ягримныл өлнэ эква Мария Николаевна Мониная потырталыс, тав 1947 талт самын патыс.

«Ам Ханты-Мансийск үст кит тал лэкарыг хаництахтамум порат тэлы үщлахтуңкве аквум палт Ягримн минасум. Тонт ам нётнэ яңк пуркал масхатасум. Тамле пурка маньщи нэт туп савсыр ялпың хоталыт ос сальң махум яныглан хотал вэрыглан порат масыгласыт. Та юи-палт хот-аңхвияныл, сарыл паргылтыяныл ос мот ялпың хотал мус акв ман та пиньяныл. Тонт яңк пурки өщнэ нэт сotyң нэг ловиньтавёсыт.

Ам ул тонт сот та хонтсум, хумим эт акван-хонтхатсумён. Ам Елена юртагим палт муйлысум. Ос Юрий, маньлат пыг, ёсал хайтыгтас, аквматэрт ёсатэт лагылмаснут кере хот-хусматас. Тувыл маныр тавён вэруңкве? Тав Елена кол пөхат люляхольс ос тув та щалтыс. Юртагим такви юн атим олыс. Мён тонт та акван-хонтхатсумён ос вайхатсумён, үнлым хоса потыртасмён. Та пасыл касың хотал вациньтахтуңкве патсумён.

Ман, маньщи агит, та порат оманувн та пилупталавёв: «Павылт хот-ати мори ул ёмён, мот маньыл ёхтум мавой киснэ ойкат танки магсыланыл нэ хотпа кинсэгыт. Тан нупыланыл ул сунсён, маньщи хотпа хумыг кинсён». Ам омам латңын хунтылысум.

Тувыл Юра эт хонтхатыглалмён юи-палт аквумн лавёгум: «Ам тыт улпыл хум вэрёгум». Аквум китыглахтас: «Оман тай наң ат ратащлавен?». Ам тавён ювле-лавсум: «Тав мот маньыл ёхтум хотпат эт аном румалахтуңкве ат тартыс, ты юртум маньщи, таимагыс таве хумыг вэрилум». Аквум туп лягалас: «Ёмас, ты наңки касащасын».

Тувыл мён Юра щане палт Восыңтүр павылн минасум. Тот мощ өлсумён ос аномн элаль хаництахтуңкве эрыс. Ам Ханты-Мансийскан та минасум. Аквумн ёмас нётвёсум. Тав касың этпос ат солкөви кетыглас, ос амки хаництахтамум маньыл хот солкөвил майлувёсум. Юра тонт Ягримт мавой нөх-винэ мат рупитас, аномн ос нётыс. Хүрум тал тох хаництахтасум ос Хальүс пүльницан практика миңкве кётвёсум. Юрам



Монин экваг-ойкаг



М.Н. Мониная апганэ эт

ос тув ёхтыс, тот акван та олмыгтасмён, тот ам агим самын патыс. Агимён этпосэ иң ат төвлыс, ам няврамың тагыл государственный экзаменыт минэ магыс Ханты-Мансийскан ювле минасум. Мёнамён нётуңкве тонт Юра щане ос ёхтыс.

Училище асламум юи-палт ам Хальүсн няврам самын патнэ колн рупитаңкве кётвёсум. Ман Хальүсн олмыгтасүв, Юра омаэтэ ос ман ётув олыс. Овыл порат касың хүрум щессыс Юра рупатаныл юв ялуңкве китыглахтас ос няврамум щаквтуңкве пүльницан тотыгласэ.

Тох тал оигпам юи-палт Юра щане юв вора-

таңкве патыс. Лави, ты руш мат хоса өлуңкве ат вёрми, такви өлнэ маньщи матён ювле таңхи.

Ман щёмьяң тагыл пуссын Восыңтүрн вантылысүв. Ам тот няврам үрнэ колн рупитаңкве патхатсум, ос Юра миркол кушай хотпаг паттувес. Тувыл миркол палыл ман колыл майвесүв. Тох та өлсүв, шуньсүв.

Тыт ос Ягримт ман манки кол унттысүв. Тыт Волотя пыгум самын патыс. Тыи сака ёмас ма, я ляпат колув үнлы. Яныг вит вэрнэтэ порат халпыл колув мус ляпан ёхтуңкве рөви».

Потыр Тамара МЕРОВА маньщи латңыл хансыстэ

Пунси павыл ханты нэ

Ты хурит ханты нэ Людмила Николаевна Каюкова пöслым öлы. Таве таквсы Нефтеюганск үст «Возвращение к истокам» öлум хöнтхатыглапыт вäслум, öлүпсатэ öвылтыт китыгласлум. Людмила Николаевна Пунси нампа ёрнколың мät самын патыс, тот яныгмас. Омаге-ätяге сäлы үрим öлсыг, вöраясыг, хул алыщласыг. Нэ тох потыртас:

– Мän ёрнколув Пыть-Ях үс ляпат люли. Омагум-ätягум Яныг Юган пäлыл öлсыг. Хурумхуйплов тälум порат омам äтимыг ёмтыс, мощ ётылнуве äтям хот-таль щалтыс. Тэн лов няврам öньцигласыг, мän ань хурум ягäги хультсув. Угут павыл школат ханищтахтасув, интернат öлсув.

1984 тälт школа äст-ламум юи-пälт Ленинград үст А.И. Герцена нампа педагогический институтт нила тäl ханищтахтасум. Тувыл ювле йисум, Угут школат няврамыт щань лätңыл ханищтым нила тäl рүпитасум. Ётыл Пунси мät öвыл клас-сытыт ханищтахтын ханты няврамыт магыс стойбищный школа вäрсум. Тот нёлолов тäl рүпитасум. Хунь школав лап-пантвес, няврамыт пуссын Чеускино павылн

тотвёсыт, элаль тот ханищтахтасыт.

Ам тув вäнтлуңкве ат касащасум, Ханты-Мансийск үсн минасум, «Ханты ясаң» газетан патхатасум. Ханты лätың сургутский диалектэ щирыл потрыт хассум. Äс угорский институтт научный сотрудиныг рүпитасум.

Үсың мät öлуңкве тärвityң, Пунси мämн йисум. Вöрт öлуңкве ёмас, лылыёпе сыстам. Тыг Нефтеюганск үсн ам рүт мäхманум ёт молхотал вертолётыл ёхтысум. Вöрт сүйпил вätсув, тыг тотсанув, ань тыналыянув.

– Людмила Николаевна, наң тамле нётнэ маснутыл ёңхатахтыг-лэгың, супыл хотьютын юнтвёсын?

– Ты амти юнтум супум. Яныг ос Мänь Югант – юганский хантыянув тамле маснутыл



Л.Н. Каюкова

öлэгыт. Ань үст сыре-сыр ялпың хоталыт вäрыглавет, мäнти маснутанув нöх-масöv, тох мощ ёмыгтöv. Ам сäv маснут кätыл юнтыгласум, төва пäkвпалың супанум Нефтеюганск үст öлнэ музейн тыналасанум. Тот рүпитан мäхум юганский хантыянув маснут акваг китыглэгыт.

Нефтеюганск үсн вäтихал ёхталэгум, наука щирыл рүпитэгум, финно-угорский учёныянув ёт ёрнэ потрыт хансэгум. Тән юганский хантыт лätңаныл ос культураныл öвылтыт акваг пүмщалахтэгыт, потраныл, мöйтаныл ёл-хансыяныл.

Тамле ялпың хоталытн вäтихал вöвиньталавёв. Ханты мäхманув пил ман хул öньщөгыт те, тыт тыналыяныл, мощ сакади олн сэлэгыт. Кätыл вäрум пормасаныл, маснутаныл öс ёт то-

тыяныл, ёвтавет. Үст сävсыр мирыт öлэгыт, мän нулув ёмас самыл сунсэгыт.

Ам аньмунт лäпкан щалтсасум, тот китыглавёсум: «Наң хатань нэ?» Ам ювле лävёгум: «Äти, ам ханты нэ». Тära ам ётум та потрамөгыт, лävөгыт: «Наң мäхум халт ул люлен, öвылн минэн, ойтхатэн». Хунь автобусыл минöv, öс аквтох, ань ханты супыл щалтöv, хум хөтпат тära нöх та люлюмтэгыт, ёл вос үнтöv.

Людмила Николаевна хөтпа нупыл сымың элумхöлас, кäркам, потрың нэ. Такви мире, щань лätңе сака эруптытэ, янытлытэ. Ханты няврамыт ханищты, тәнанылн ос рүт мäхманэн сävнётмилвäри. Пускät, пус лäгыл вос öлы, вос щуни!

Светлана РОМБАНДЕЕВА



Людмила рүтанэ ёт пöслым öлы

Түйтыл вәрим пұмыш хурит



Ам акв хөталт Ханты-Мансийск үс котильн түйтыл вәрим элумхөласыт пөслаңкв Борис Лосев нампа паркын ялсум. Ам тув турманлан элы-пәлт минасум.

Хунь тув ёхтысум, түйтыл вәрим осэвәтал сәв уит кәсаласанум, та пәсыл ам нәматхөт, нәматхоты пәвылт тамле уит ат вәшинтасум. Ёхтысум тув, хунь та уит кәсаласанум, хот-щәгтсум.

Тот вәсум: пищпищ сыр тармыл, выгыр кенътың әгирищ, нәнил вәрим пувыр поталы, Мальвина,

ханты экварищ ёрнколэ пөхыт, клоун, пупәпщикев хул пувим үнлыс ос осэвәтал уйкве олыс, ам тот ёмыгтасум, пуссын пөслысанум.

Ам коньпәлумт ос сәв элумхөлас, щәмьят нывраманыл ёт ёмыгтасыт, пөслахтасыт, уит сунсыгласыт. Тамле утыт ты үст кәсың тәл, насати вәрыгланэт.

Түйтыл уит вәрнә мәхум тәнки халанылт кассыт, суссыт, хотьютананыл щар пұмыш уй вәрыс, тав нөх та патыс.

Евгений АНЯМОВ

Әлыл ёхтум пищма

Мән редакциявн Тольятти үсныл пищма ёхтыс. Таве Борис Иванович Иванов хансыс. Ойка ләви, 1960 тәлт Свердловский область Нижний Тагил үст самын патыс. Хунь иң школат ханищтахтас, тән щәмьяныл Кушва үсн вәнтлыс, тав ат кос таңхыс ос омаге-әтыге колыл тот майвесыг, тув та минасыт. Тав яныгмам мәтә сака әруптыгә, тот нәрыт ляпат вөре сыстам, сәв яквет овтәгыт.

Нәлолов класс әсламе юи-пәлт Нижнетагильский техникумн тер толтын хөтпаг ханищтахтәкве минас. Та юи-пәлт армиян вуйлувес, юв ёхтыс, нә тотыс, нәтәнтыл Тольятти үсн олүкве вәнтлысыг. Тот олнә мәтә ос кос емас, ос аквосытыл яныгмам мәтә номитә, номтән тувле хартаве.

Әлаль тав хансы, онтолов тәл ювле хульгум порат илттыг инсульт әгмыл емтыс, ань тувыл

пәсыл торың рүпитаңкве ат вәрми. Сәвсыр нәпакыт ловиньтаңкве патыс, мән нәранув урыл матыр вәңкве тавән татем пұмшиг емтыс, мәншигит хөт оләгыт ос маныр тән вәрәгыт. Ләви, мән порат үлмаям үлме номитә, аквтупмат ёрнколт нөх-сәйкалы, хасап нөңхаль әлмитә, кональ сунсы, хөталың хөтал, түйт нас вольги, элын яныг сәлы пұң ёңхи. Сәлыт халанылт аньта-

нын акван-хөигләгыт, сәлың хумыт тыньсаң рөпыгтәгыт, сәлы пувегыт. Тав эрттам ос тыньсаң пәхвты, яныг аньтың хәрөйка пувитә. Ты үлм тав олнәт сыс акваг та номитә.

Ань тав сәвсыр нәпакыт ёвты, мәншици мир урыл нәпакыт ловиньты. Борис Иванович таимәгыс мәнавн пищма хансыс, тав мәншици ләтың ханищтаңкве таңхи ос «Лүимә сәрипос» газетавн вәс ёхтаве. Мән газетав туп округ янытыл хасылтаңкве рөви, тувыл әлаль мән туп нас пищмал тәтуңкве вәрмев. Ты коньпал тав А.Н. Баландин ос Е.И. Ромбандеева хансум нәпакыг вөви. Тамле нәпакыг мән мәнти ат оныңев, тав хансум пищматә ам тах

Әс-угорский институтн тәтылум, эрың тән тавән эрнә нәпакыт хөнтәгыт.

Ойка татем емас ләтңыт мән мәншици мирув урыл хансы, мәнав, «Лүимә сәрипос» газетат рупитан мәхум, сымыңыщ янытлыянә, ләви, мән сака емас тәла вәрөв. Мән тавән мәнти вәрнә газетанув пищмал тәтуңкве патыянув, ятил ләтыңтөв вәс ханищтытә ос вәс ловиньты.

Мәншици ләтңыл ловиньтан ятил мәхумквет, нән мәнавн пищма ос хансән, нәнти олупсан, рүтанын манос матыр емас вәрмаль урыл хансән. Сәвнув мир ты урыл вәс вәгыт.

Мәншици газетат кұщаиг рүпитан нә Галина Кондина потыр хансыс

СОССА МИР ӨЛУПСА

Кышик павылн ялмум урыл



Маньлат мир ёт рупитан ханты хум Руслан Богордаев тал котиль этпос порат 19 щислат Кышик павылн ялуңкве а́нум ёт-воыгластэ. Та павылт олнэ библиотекат муйлын хотал варыглавес.

Ам тув ос ялсум, тот ханты ос маньщи махум акван-атхатыгласыт, Владимир Семёнович Волдин урыл потыртасыт. Ам амки таве ат вәслум, махум лавсыт, эрттум тав ханты поэт, савсыр стихыт хансыс.

Ты хум 1938 тал яңк нәтнэ этпоста 25 щислат Кышик пөхыт олум Сың-Вар павылт самна

патыс. Ворян ос хул пувнэ ханты щемьят яныгмас.

Ханты поэт ёмас стиханэ осэвәтал «Ленинская правда», «Тюменская правда», «Тюменский комсомолец» на́мпа газетат хансыглавесыт. Тувыл ос мот савсыр нэпакытт, учебникытт вәрим олэгыт. Сака хоса тал, ань

ты хотал мус Владимир Волдин нэпаканэ самна кәсалахтан кәмт, округта, Россия мāt ос элы сәмт оныщавет.

Ман ос тув минамун порат вөр ләңхыт ёл-пөйтсасув, пурлахтасув, кёр олн пахвтысув. Ётыл хунь тув ёхтысув, маньшит вәрнэ хурип мань колна пөйтсув, щай айсув, мощ унлахолсув, тувыл ущ библиотека колн минасув.

Владимир Семёнович агитэ Татьяна Волдина Ас-угорский институтта рупиты, экватэ Мария

Кузьминична Волдина ос стихыт хансы. Ам ань Кышик павылт ты хум урыл сав потыр хунтласум, сав хури тот вәрсум.

Библиотекат ат щёс мус унлысув, махум пуссын мар вагыт, тая та потыртасыт ос суссылтасыт. Элалы ос Уй йиквнэ нак урыл кина суссув, ётыл йиквуңкв пуссын люльсыт.

Экват осэвәтал ханты эргыт эргысыт, йиквсыт, акв ойкарищ ос сәңквылтапыл ёнгыс, эргыс. Ам ос маньщи ләтңыл рәп-эргыт тәна-нылн ловиньтасанум, эргысанум. Ётыл тәңкв минасув, ёмашакв тәсув. Тувыл ушта ювле щёпитахтаңкв патсув, щёпитахтын торыг ос мощ пөслахтасув. Ювминнэ элы-пәлт мощ унлахолсув, «ос ёмас улум» ләтың лавсув, машинан тәлсув ос юв та минасув.



Евгений АНЯМОВ

Лүимә сәрипос

(Северная заря)
№2 (1212), 30.01.2020
Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция

Врио директора –
Кондина Г.Р.
Телефон (3467) 33-22-72

Заместитель гл.редактора –
Кондина Г.Р.
Телефон (3467) 33-22-72

Ответственный секретарь –
Узель В.В.
Телефон (3467) 33-23-09

Адрес редакции и издателя:
628011, г.Ханты-Мансийск,
ул.Комсомольская, 31
тел./факс (3467) 33-17-52

Е-mail: gazeta@khanty-yasang.ru
Газета размещена на сайте
www.khanty-yasang.ru

Отпечатано:
ООО «Новости Югры-
Производство» г. Сургут,
ул. Маяковского, д. 14.

Индексы 04399, 54399
Тираж 1710 экз.
Заказ 294
Цена свободная

Мнение авторов
публикаций не
обязательно отражает
точку зрения редакции.

Газета зарегистрирована
Управлением Федеральной

службы по надзору
в сфере связи,
информационных
технологий и массовых
коммуникаций
по Тюменской области,
ХМАО-Югре и ЯНАО.

Свидетельство
о регистрации
ПИ №ТУ 72-00795
от 23 января 2013 г.